

Been Im Ju Pa Koe Ka daux

Phuk Lai Sigang Khri



Baux (3)

Khrawm Kaīng Lai

Simin	Kaīng Lai	Plah Lai
1.	Grawh Grawng Lih Hu Khaing Meung Ejiptux 1
2.	Gumlox Pingnyap Son Pui Isarilax 13
3.	Grawng Pa Lailing Daux Tiag 25
4.	Haktiex Pa Tiextu Siyiex 37
5.	Pui Pa Pon Krax Taoh Luan 47

Title: The living story from the Bible

Translated to the Wa language by:

Yex Ka Lin

Ai Sang Awng

Sam Lao Pao

I Rong Khun

Ai Kap Sin

Sai Rong Khun

Edition: First Draft

Date: 29. 7. 2016

Kheu lai riieng pa plak plih pakpeung gumlox Siyiex in kieh aik o
paox grawm mai ceu cao pa koe ka piang haktiex khawm uik
mawh buanson, riang rao ka daux


Yesux Khrit liak.

Translated from the English *Open Bible Stories*. Original work available at unfoldingWord.org/stories


This work is licensed under the Creative Commons Attribution-NonCommercial-ShareAlike 4.0 International License. To view a copy of this license, visit <http://creativecommons.org/licenses/by-nc-sa/4.0/> or send a letter to Creative Commons, PO Box 1866, Mountain View, CA 94042, USA.

Grawng Lih Hu Khaing


Meung Ejiptux




Lai Lih Hu 12:33–15:21



Pui ceu Isarilax kied gaux rhawm kheu pon lih tix khaing meung Ejiptux heue. Kix luat luan khaing yaox ti yuh siliex. Kix yaox ti hu ka haktiex pa hoik tawx Siyiex gumlox sijax mukheu. Pui meung Ejiptux tawx kix viex kraung mau, kraung khri pa ting ngawh jum khankix hu heue. Pui ceu Ejiptux tiblah, pa mawh pui pa yum rhawm ka Siyiex lih hu tau mai kix heue.




Yam pon ngaix Siyiex thung kix hu krax ka rong pai awm, yam pon sawm Siyiex thung kix hu krax ka rong ngu. Siyiex hu tau ot tau mai kix, thung kix ku jheeng heue. Beeh glawm cie kix mawh pa lo ti nghiet mai hawt ti yuh awm pa cau Siyiex ka kix heue.



Ang rheung simiang Pharaw mai cub pui naing hawt ti pheet giex ka pui Isarilax son sang kieh kix yuh siliex baox tix bawg. Siyiex kieh grawng in kix lih ti koe son sang jhi Nawh grawng ting siawp Tix mai grawng ting min plak ngai Tix heue.



Yam yaox pui Isarilax pui Ejiptux hawt khaix kix, kix kied lhat graung kah heue. Kix nyia mai ah nin, “Ex lih khaing meung Ejiptux kheu jao pa tix? Ang rheung ex dex sang hoek krax yum.”




Mose ah yuh nin, “Paw vi lhat graung, Siyiex tag yuh naing son ex, ex tag pon pa luat luan.” Khaix an Siyiex mhaing Mose nhie pui Isarilax tiang ka rawm sigrit sigra raoh heue.



Rong pai awm koe sinax pui Isarilax mai pui naing Ejiptux. Rong pai awm an tieb tie son ang pui naing Ejiptux chix yaox ka pui Isarilax heue.



Yam Mose yaog khaox gix tix mai nyeu piang rawm sigrit sigra raoh, Siyiex kieh bhaung ting hoek ti phlu piang rawm heue. Bhaung goih rawm hu plak goix plak dawm mai lih ti mawh krax tix nyaing heue.



Pui ceu Isarilax lawng hu sigreung rawm sigrit sigra dee kroh tiex. Yam an rawm hoik lih ti mawh awm guh ding lhaong ka praok krax plak goix plak dawm heue.



Yam bleeh pui Isarilax plak toi rawm, rong pai awm haok dee lhaong mai pui naing Ejiptux khankix hawt khaix kix heue.



Siyiex tawx krax kha ka pui naing Ejiptux leeing krax. Kieh pui naing mai lawx brung glip daux rawm. Kix to mai riag yo ah nin, "Siyiex hoik ot plak pui Isarilax mai yuh naing ka ex heue."




Khaix hoik bleeh plak toi rawm, Siyiex nhie Mose nyeu taix tix piang rawm. Yam Mose yuh awm pa krai Siyiex, rawm kheem ka krax dee kroh tiex mai lih ti mawh rawm sigrit sigra awm sivoe heue. Mawh kheu nan pui naing Ejiptux glip daux rawm khawm uik heue.



Yam yaox Isarilax ka yum pui Ejiptux khankix, kix yum rhawm ka mawh Mose cao jhai pa hoik ploi Siyiex heue.



Kix kied gaux rhawm kheu taoh Siyiex kix luat luan khaing mawh siliex mai khaing krax yum. Yam in kix chix ti rieb cau ka Siyiex awm pa koe rhawm tix heue. Mawh kheu nan kix rhax lai, graoh mai yaogyaw buanson Siyiex Cao pa taoh ka kix heue.



Siyiex nhie kix yuh poi Pasakha ku num, son sang doh keud kix ka pex tix pui naing Ejiptux mai ka pon luat luan tix khaing mawh siliex khaing meung Ejiptux heue. Yam yuh poi an, kix tan kawn yung tix mu mai krai grawng pa hoik taoh Siyiex kix luan khaing meung Ejiptux heue.

K. Deeh Theng Ka Been

1. Mawh kheu pa tix pui Isarilax gaux rhawm kheu pon lih tix khaing meung Ejiptux?
2. Mawh pui pa yuh ka mawx pa pon lih tau mai pui Isarilax?
3. Siyiex thung pui ceu Isarilax hu krax yuh ka mawx?
4. Siyiex simie pui ceu Isarilax yuh ceu pa tix?
5. Pui ceu Isarilax nyia yuh ka mawx?
6. Son sang pon tiang rawm sigrit sigra raoh, Siyiex cox khre daux krax yuh ka mawx?
7. Yam yuh poi Pasakha pui Isarilax yaox tix yuh, yuh ka mawx?

Kh. Krax Pa Doh Rhawm Ka Been

1. Maix yaox rhawm rhi pui ceu Isarilax koe yuh ka mawx ka daux been in?
2. Maix yaox Siyiex yuh ka mawx ka daux been in?
3. “Meung Ejiptux, simiang Pharaw mai pui ceu Isarilax” plak plih jhi ka pakpeung yuh ka mawx?
4. Maix yaox yuh ka mawx grawng pa yuh Siyiex pui Ejiptux laux leeing?

G. Krax Pa Deeh Shiao Daux Ju Tix Khaing Been

1. Yam hoik grai krax keud pot jun pot yam in ju maix, maix yuh ceu pa tix?
2. Phan maix mawh cao kaing awm Mose, maix sang thung ka pui hawt khaix maix yuh ka mawx?

Ng. Ceu Pa Rieb Gau Ex Khaing Been In

1. Siyiex kia ngiien ka ex ku bawg yam.
2. Yam ang lai koe krax pa keud pot jun pot son kawn pui kawx,
Siyiex chix khre daux krax son ex.
3. Siyiex simie kawn pui khawm uik luat luan khaing tawm taix
Satan mai luan khaing siliex phimap.
4. Awm Mose teei riang rao ka Siyiex, ex pa mawh cao kaing
khankix kawx, caw tix cung ka piang gumlox sijax mukheu
Siyiex cao pa tawx riang rao ka ex heue.

P. Baux Lai Pa Caw Tix Ci

Lai Yaogyaw 121:5


*Simaing Siyiex mawh cao pa priex maix heue. Mai Simiang
Siyiex mawh veei dee deuh maix rhawm mai ot plak taix khawn
dawm maix heue.*

Gumlox Pingnyap Son


Pui Isarilax



Lai Lih Hu 19 -34



Khaix hoik kieh Siyiex pui Isarilax tiang rawm sigrit sigra Edom, Siyiex kok kix hu daux tiag mai haok ka gawng Sina heue. Kix sum nyiex gox ka caong gawng Sina son sang ot tix heue.




Siyiex ah nin ka Mose mai pui Isarilax, “Phan pex cu nghiiet ka gumlox Aux mai priex ka gumlox sijax mukheu Aux, pex tag mawh singao cie Aux, Cao giex kaing li pa singax singeh cie Aux heue.”



Khaix hoik rheung 3 ngaix, yam hoik yuh kix dee ot tix mhawm Siyiex lih hoek mai kieh lox tuh sah sinum, puk plak praix lih, pai awm ceep ka piang gawng heue. Mawh Mose tix kaux khaing pa koe akhuang ti haok ka piang gawng Sina heue.




Siyiex yuh sijax mukheu mai ah yuh nin, “Aux mawh Siyiex leeing ju, Siyiex pa taoh pex lih khaing meung Ejiptux.




Lheu khaing Aux ang pon ti krub Siyiex tang kaux. Ang pon ti yuh riang rao mai krub kah. Ang pon ti kok ceu kaux Siyiex giex going. Doh keud ka Singaix tuah mai een singax. Caw ti yuh kaing ka daux liah singaix. Ka daux Aliah singaix son sang doh keud ka Siyiex caw ti laux lee tix heue.




Yung yi ka miex keeing tix. Ang pon ti pah pui yum. Ang pon ti phit vao mai moeng kawn pui. Ang pon ti briex. Ang pon ti pie. An pon ti kham mhai sakse pa ang mawh ang meh ka paox plawg paox nyawm tix. Ang pon ghoing ka nyiex ma pui, moeng kawn pui mai kraung cie pui.



Khaix an Siyiex tiem piangnyap 10 gum piang khlawp simaox mai tawx ka Mose heue. Lheu khaing pingnyap 10 gum, Siyiex kawn baox tawx pingnyap tang ceu mai been sigang pa caw ti hawt yuh ka pui Isarilax heue. Siyiex ah nin, “Phan pex cu nghiiet ka lox pingnyap, Aux sang kia ngiien ka pex mai nawb buan ka piang pex heue. Phan pex ang cu nghiiet, Aux tag sang tawx phimap ka pex heue.”



Siyiex kieh pui Isarilax yuh nyiex gox buan man awm pa simie Nawh ti yuh heue. Kix kok nyiex gox buan man an mawh nyiex gox dee kraix khrawm pui ti kum paox tix heue. Nyiex gox buan an koe lawg 7 lawg, kix keu lawg an kix ka man heue. Lheu khaing cao giex kaing li pui ang pon ti laig ka daux lawg an kix. Mawh kheu ot Siyiex ka dah dee an heue.



Pui pa ang nghiiet ka lox Siyiex tag yaox ti viex tan khawng brie tix mu ka daux nyiex gox buan heue. Cao giex kaing li tag pah khawng brie an mai gleeing ka piang khu dee tan. Nham khawng brie an mawh pa pluat ploi ka phimap, pa kieh singax singeh. Siyiex laug puxke Mose pa mawh Arun mai doeh Arun mawh cao giex kaing li heue.



Pui ceu Isarilax khaw rhawm ka lox pingnyap pa yuh Siyiex, son sang krub ka Siyiex tix kaux khaing mai son sang mawh tix pui cie Siyiex ngie khaing heue. Viang mawh nan ang rheung, kix deeh baox yuh phimap pa kied ting heue.



Mose haok sikah mai Siyiex piang gawng Sina tom rheung singaix. Kix ang lai pon pau ka Mose, kix teei khri pa koe tix mai tawx ka Arun heue. Kix nhie Arun yuh riieng moi ka khri an son sang krub kah heue.




Arun teei khri tawx kix mai yuh riieng moi khri tix mu heue. Kheu krub kix ka riieng moi khri an, Siyiex kied meet rhawm mai keud ti sang prawng ca ka kix heue. Viang mawh nan Siyiex nghiiet ka lox rawg buan Mose, ang kieh kix hoek krax laux leeing heue.



Yam lih Mose khaing gawng, nawk kied song rhawm kheu
yaox riieng moi pa yuh kix mai nawk taing ti tik khlawp simaox pa
tiiem ti deuh lox tawm pingnyap 10 gum max heue.



Khaix an nawk kreed ka riieng moi khri pa yuh kix tom
phawng mai sau daux rawm kieh kix nyaux heue. Siyiex kieh
jhawm saux preng hoek piang kix, mai kix kied yum tom nie heue.



Mose deeh haok piang gawng mai rawg buan ka Siyiex son sang pluat ploi phimap pa yuh kix heue. Siyiex nghiiet ka lox rawg buan Mose mai pluat ploi ka phimap kix heue. Mose deeh tiiem lox tawm pingnyap ka piang khlawp simaox pa khraox heue. Khaix an Siyiex viex kix hu singai khaing gawng Sina ka haktiex pa tawx Nawh gumlox sijax mukheu heue.

K. Deeh Theng Ka Been

1. Khaix hoik tiang pui Isarilax rawm sigrit sigra, kix hoek dee mawx? Siyiex ah pa tix ka Mose mai pui Isarilax?
2. Khaix hoik yuh pui Isarilax dee ot tix, Siyiex yuh pa tix?
3. Khaix hoik tawx lox Pingnyap 10 gum, Siyiex tawm lox yuh ka mawx ka pui Isarilax?
4. Siyiex nhie pui Isarilax yuh pa tix? Dah dee an mawh dah dee pa yuh ka mawx?
5. Pui ceu Isarilax khaw rhawm tix yuh pa tix mai Siyiex?
6. Kheu ang kix lai pon pau ka Mose, kix yuh pa tix?
7. Yam yaox Mose pui ceu Isarilax yuh phimap, Mose yuh pa tix?

Kh. Krax Pa Doh Rhawm Ka Been

1. Kheu pa tix Siyiex tawx lox Pingnyap 10 gum ka pui Isarilax?
2. Ka daux been in, maix yaox pui Isarilax koe jhawm pa yuh ka mawx ka daux been in?
3. Ka daux been in, maix yaox Mose mai Arun mawh cao kaing pa yuh ka mawx?
4. Ka daux been in, maix yaox Siyiex mawh pa yuh ka mawx?

G. Krax Pa Deeh Shiao Daux Ju Tix Khaing Been

1. Khaix hoik tawng maix gumlox Pingnyap 10 gum, maix pon rieb gau ceu pa tix?
2. Siyiex deuh ex kawn pui mawh pa koe ngawh koe jum, mawh kheu nan ex caw tix koe rhawm pa yuh ka mawx ka paox kawn pui tix?

Ng. Ceu Pa Rieb Gau Ex Khaing Been In

1. Siyiex simie ex cu nghiiet ka gumlox Pingnyap Nawh mai hawt tix yuh heue.
2. Ka daux ju ex, phan ex ang pon pau ka bawg yam cie Siyiex mai phan ex tang teei rhawm rhi pa simie tix yuh, ex tag yaox krax laux leeing heue.
3. Phan ex ang cu nghiiet ka cao kaing pa ciak Siyiex ka son ex, chix lih tix mawh krax pa sivix son khawm uik.


P. Baux Lai Pa Caw Tix Ci

Lai Lih Hu 20:3


Lheu khaing Aux maix tag ang pon tix krub ka Siyiex tang kaux tang hak.

Grawng Pa Lailing


Daux Tiag




Lai Lih Hu 16–17, Lai Simin 10–14, Lai Sidiex 34




Khaix hoik pon ka gumlox pingnyap ka piang gawng Sina, Siyiex thung kix hu ka haktiex Khanan awm gumlox sijax mukheu pa hoik deuh Nawn heue. Siyiex kieh rong pai awm jhi daux krax son kix heue.




Awm hoik tawx Siyiex gumlox sijax mukheu ka Abraham, Icak mai Yakop, Siyiex viex kawn praix kix hu ka haktiex pa hoik tawx Nawn gumlox sijax mukheu heue. Viang mawh nan daux haktiex an pui tang ceu hoik ot ka daux tom nie heue. Haktiex an mawh haktiex Khanan. Pui pa ot daux haktiex Khanan ang yum rhawm ka Siyiex. Kix ang krub ka Siyiex pa mawh pa meh, kix mawh pui pa yuh ka ceu pa caox heue.




Siyiex nhie kix grheu pui Khanan khankix lih khaing haktiex Khanan heue. Ang cu kix yuh paox pie mai pui Khanan, ang cu kix koe nyiex ma mai pui Khanan, Nhie kix yieh ti tik ka riieng rao pa hoik yuh khankix khawm uik heue. Siyiex ah nin, “Phan pex ang yieh ti tik ka riieng rao an kix, Aux lhat pex krub kah heue.”




Yam bleeh pui Isarilax ka mee praix Khanan, Mose laug pui 12 kaux ka daux pui ceu Isarilax 12 ceu mai ploi kix hu jiang ti yaox daux meung Khanan son sang tawng ka grawng pa iak riang phan ang mawh nan pa ting riang kix heue.




Yam hoik rheung 40 singai, pui hu jiang 12 kaux deeh viex satang hoek heue. Pui jiang ah nin mai lhat graung tix, “Haktiex Khanan sidaing mhawm. Can ceu pa sum kix kawx sidaing mhawm. Veng sum kix kawx sidaing kaux. Pui kix kawx kied ting lhaong kaux hak heue. Phan ex hu yuh naing mai kix ap ex ti yum tete heue.”




Yawsux mai Kaliep pa viex ka daux cao jiang ah nin, “Pui veng Khanan ting lhaong mhawm kaux hak tete. Viang mawh nan kawx ex tag sang pex ka kix tete. Mawh kheu Siyiex tag sang ot plak ex heue.”




Viang mawh nan pui hun ngau ah nin ka Mose mai Arun, “Yix mhawm ti yum daux haktiex Ejiptux phan ang mawh nan daux tiag, daux naing! Siyiex viex moeng kawn yix hoek huh siliex haktiex in lie? Ang yix khaw ti ot daux meung Ejiptux ngie lie?” Kix simie ti pah Mose mai Arun yum mai kix simie tix cie cao kaing pa khraox son sang deeh viex kix deeh ing ka daux meung Ejiptux heue.




Siyiex kied song rhawm mai plak jhi kix yaox min plak ngai Tix daux nyiex gox buan man bang kum heue. Siyiex ah nin, “Lheu khaing Yawsux mai Kaliep, pui pa koe ju 20 num haok ka piang tag yaox ti lailing daux tiag tom yum tix. Kix ang pon ti laig ka daux haktiex pa tiextu Aux ti tawx heue.”




Yam mhong kix grawng an, kix doh keud ka phimap pa hoik yuh tix heue. Mawh kheu nan kix teei kraung naing tix mai lih hu ka daux veng Khanan son sang yuh naing heue. Mawh kheu ang Siyeix lai ot plak kix, Mose ang cu kix hu. Viang mawh nan kix ang nghiiet ka lox Mose.




Mawh kheu ang Siyeix ot mai kix, kix som ka daux naing mai pui kawx kied yum heue. Pui pa deuk khankix lih khaing veng Khanan mai yaox ti rheung ot daux tiag 40 num heue.




Yam ot kix ka daux tiag, Siyiex tawx ceu pa lo kix ku ceu heue. Siyiex ploi kix ih khaomun mannat khaing raoma. Son sang yaox kix ti ih nex, Siyiex kieh keed naog hawt nyiex bang dee ot kix heue. Ka daux 40 num, Siyiex ang sax kieh kix cud cha ka kraung ceep eep sawm tix bawg kawx heue.




Siyiex yuh mhai pa daox deng kieh kix nyaux rawm lih khaing rang. Pui ceu Isarilax ang vhah rhawm ka Mose, kix ngau mai nyia jheeng jheeng heue. Viang mawh nan Siyiex kaux sijax ka pa hoik tiextu Tix ka Abraham, Icak mai Yakop heue.



Tix bawg, pui Isarilax ang koe rawm nyaux. Siyiex ah nin ka Mose, “Tawx lox ka rang, rawm tag sang lih heue.” Viang mawh nan Mose nu nai ka Siyiex sivoe ngai pui khankix, nawh ang tawx lox ka rang, nawh lah rang 2 taix. Pui khankix yaox ti nyaux rawm lih khaing rang. Siyiex meet rhawm ka Mose mai ah nin, “Maix tag ang pon ti laig ka daux haktiex pa hoik tiextu Aux.”



Khaix hoik lailing pui Isarilax ti ot daux tiag 40 num, kix baox tieh feen ka Siyiex, Siyiex baox tawx kix ot daux tiag heue. Yam an Mose hoik kied riex ju. Mawh kheu nan son sang thung pui laig ka daux haktiex pa tiextu Siyiex, kix laug Yawsux mawh cao kaing heue. Siyiex ah nin ka Mose, “Tix ngaix, Aux tag sang ploi cao jhai pa awm maix lih hoek tix kaux.”



Siyiex kok Mose haok piang gawng mai jhi nawh yaox ka haktiex pa hoik tiextu Nawh heue. Viang Mose yaox haktiex an ka ngai tix kawx nawh ang yaox ti laig ka daux heue. Khaix hoik yum Mose pui ceu Isarilax doh keud mai yiiem doe son nawh 30 singaix heue. Yawsux mawh cao kaing pa mhawm tix kaux heue. Mawh kheu jao mawh nawh pui pa yum rhawm ka Siyiex mai cu nghiiet ka gumlox Siyiex heue.

K. Deeh Theng Ka Been

1. Pui pa ot daux haktiex Khanan mawh pui pa yuh ka mawx?
2. Phan hoek haktiex Khanan Siyiex nhie kix yuh pa tix?
3. Cao jiang 12 kaux deeh hoek tawx satang yuh ka mawx?
4. Pui hun khankix ngau yuh ka mawx? Siyiex ah pa tix ka kix?
5. Kheu ang kix koe krax pa cu nghiet, kix yaox ti sipub ceu pa tix?
6. Siyiex priex kix yuh ka mawx ka daux 40 num?
7. Mose nu nai ka Siyiex yuh ka mawx? Siyiex ah pa tix ka nawh?
8. Khaix hoik riex ju Mose, Siyiex laug cao kaing pa yuh ka mawx son kix?

Kh. Krax Pa Doh Rhawm Ka Been

1. Mawh kheu jao pa tix Siyiex ang kieh kix yuh paox pie mai ang cu kix koe nyiex ma mai pui Khanan?
2. Maix yaox rhawm rhi cao jiang 10 kaux mai rhawm rhi Yawsux mai Kaliep tang yuh ka mawx?
3. Maix yaox Siyiex yuh ka mawx ka daux been in?
4. Jhawm pui Isarilax pa koe ka daux been in mai jhawm kawn khrit baux yam in tang yuh ka mawx?

G. Krax Pa Deeh Shiao Daux Ju Tix Khaing Been

1. Siyiex ang cu pui Isarilax yuh paox pie, koe nyiex ma mai pui Khanan. Awm an ex caw ti im ju yuh ka mawx sinax pui pa ang tawng ka Siyiex?
2. Kheu Siyiex ang ot mai pui Isarilax, kix som ka naing mai yaox tix yum tom nie. Son sang ot Siyiex ka daux kaing pa yuh ex, ex caw ti im ju yuh ka mawx?

Ng. Ceu Pa Rieb Gau Ex Khaing Been In

1. Siyiex koe rhawm rhi ti kieh ex kub ih kub ot mai Nawh khre rien ceu pa lo ex ku ngaix.
3. Yam yaox ex krax nu krax khawm, ex caw tix koe ngai plak khuan chix yaox ka pa mawh pa meh Siyiex.
3. Ex caw ti mawh mhai pa mhawm son pui pa ang tawng ka Siyiex mai ang caw tix hawt yuh been ang mawh ang meh khankix.

P. Baux Lai Pa Caw Tix Ci

Romax 8:31

Phan mawh nan ex sang ah ka mawx kah grawng ceu in khankix? Phan Siyiex ot plak ex, mawx pa sang ot tang plak ti yuh ka ex?

Haktiex Pa Tiextu Siyiex




Lai Yawsux 1-24




Dee sidah, hoek bawg yam laig pui Isarilax ka daux haktiex pa tiextu Siyiex. Yawsux ploi cao jiang 2 kaux daux meung Khanan, veng Yerikho heue. Guh veng pa kaux pa cong hoik vung viang ka veng Yerikho heue. Bun coh kaux, pa mawh ceu kaux Rahap, pa yum rhawm ka Siyiex teem ka cao jiang an kiex heue. Kiex yuh krax tiextu mai Rahap son sang teem ka nyiex ma Rahap yam yuh veng Yerikho laux leeing heue.



Son sang bleeh ka haktiex pa hoik tiextu Siyiex, Pui Isarilax yaox ti tiang rawm klawng Yawdan. Siyiex mhaing Yawsux tawx cao giex kaing li hu sivoe. Yam caong cao giex kaing li cucx daux rawm, rawm ang lai hu heue. Mawh kheu nan pui Isarilax yaox ti lawng krax hu dee kroh tiex heue.



Khaix hoik tiang ka rawm klawng Yawdan, Siyiex krai Yawsux mhong grawng sang caw ti hu puing naing yuh ka mawx ka veng Yerikho. Pui khankix cu nghiet ka lox Siyiex. Pui pa giex kraung naing mai cao kaing li lai lawm ti cuang vung viang veng Yerikho tix ngaix tix bawg tom hoik liah singaix.




Yam hoik aliah singaix, kix lai lawm ti cuang veng aliah bawg. Yam cuang bawg ghoik cao kaing li phlu teettawng mai pui pa giex kraung naing khankix kok yo lox tix heue.




Khaix an guh veng khankix hoik grhyp khawm uik. Awm pa hoik tawm Siyiex, pui Isarilax yuh can ceu pa koe daux veng laux leeing heue. Mawh Rahap mai pui nyiex ma nawh khaing pa pon ti luat luan heue. Kix lih ti mawh pui pa viex ka daux cub pui Isarilax. Yam pui Khanan pa kawn deuk khankix mhong ka grawng laux leeing veng Yerikho, kix die lhat graung kah heue.




Yam an son sang pon ti yuh paox pie mai Yawsux, doeh pui Khanan pie ti mawh pui pa kaoh khaing krax singai heue. Viang mawh nan Siyiex ang cu pui Isarilax yuh paox pie mai pui Khanan. Yawsux mai pui Isarilax ang chawk ka grawng mawh kix pui kaoh dee mawx ka Siyiex. Kix rieb ti yuh paox pie mai pui Khanan heue.



Siyiex kieh pui Khanan koe krax sivix. Singaix an Siyiex ot ti yuh naing plak pui Isarilax mai kieh pre ting lih. Pui Khanan laux leeing mai hoek krax yum tom nie heue.




Son sang pon yuh pui Isarilax pui Khanan khawm uik laux leeing, Siyiex kieh singaix kaog heue. Ka daux singaix an Siyiex tawx pui Isarilax pex yuh naing pa kied ting heue.



Pui Khanan pa kawn deuk khaix som ka naing khankix baox kraix khrawm paox tix puing ka pui Isarilax heue. Yawsux mai pui Isarilax pon yuh kix laux leeing heue.



Khaix an Siyiex goih ti tawx haktiex pa hoik tiextu Nawh ka pui Isarilax awm pa koe kix cub mawx cub an heue. Siyiex kieh mee praix haktiex pa hoik tiextu Tix khankix yiien yawg heue.



Yam hoik riex ju Yawsux, Yawsux kieh pui Isarilax kraix khrawm tix hoek sivoe ngai tix heue. Khaix an Siyiex baox yuh sijax mukheu pa khraox mai pui Isarilax heue. Pui Isarilax kawx khaw rhawm ti priex hawt jhaw ka gumlox sijax mukheu an heue.

K. Deeh Theng Ka Been

1. Mawh pui mawx pa teem ka cao jiang 2 kaux? Nawh mawh pui pa yuh ka mawx?
2. Pui Isarilax tiang rawm klawng Yawdan yuh ka mawx?
3. Siyiex nhie Yawsux mai pui Isarilax yuh naing ka veng Yerikho yuh ka mawx?
4. Doe h pui Khanan pie pui Isarilax yuh ka mawx? Yawsux mai pui Isarilax rieb ka kix ka daux pa yuh ka mawx?
5. Siyiex teem pui Isarilax yuh naing yuh ka mawx?
6. Siyiex kieh mee praix haktiex Khanan yuh ka mawx?

Kh. Krax Pa Doh Rhawm Ka Been

1. Kheu pa tix Siyiex kieh cao kaing li hu sivoe yam tiang ka rawm klawng Yawdan?
2. Maix keud yuh ka mawx ka grawh grawng pa grhup guh veng Yerikho?
3. Krax pa phlu kix teettawng koe dee bleeh yuh ka mawx?
4. Maix yaox Siyiex yuh ka mawx ka daux been in?

G. Krax Pa Deeh Shiao Daux Ju Tix Khaing Been

1. Son ang maix pon dex dawd mai Siyiex, mawh guh veng pa yuh ka mawx pa tieb tie ka daux ju maix?
2. Maix sang pex yieh ti tik guh veng pa koe ka daux ju maix yuh ka mawx?
3. Maix kawn pon rieb gau ceu pa tix khaing been in?

Ng. Ceu Pa Rieb Gau Ex Khaing Been In


1. Krax pa rieb ex ka pui Siyiex mawh buanson son nyiex ma ex heue.
2. Num riah krax pa pex pon ex ku ceu khawm uik, mawh kheu Siyiex khaing. Ang mawh kheu riang rao ex mai pa cheung ex.
3. Siawp sibrawm koe ka daux lox pa yaogyaw ex ka Siyiex.
4. Siyiex mawh cao pa pon tawx krax yiien yawg ka haktiex.

P. Baux Lai Pa Caw Tix Ci


Lai Yawsux 1:9

Teei riang rao tix mai kieh koe rhawm kua daux ceu pa mhawm heue. Paw doh kieh koe krax lhat krax graung mai paw koe krax laux rhawm laux rhi awx.


Pui Pa Pon Krax Taoh Luan




Lai Cao Prawng 1–3, 6–8




Khaix hoik yum Yawsux, pui ceu Isarilax khankix ang grheu ka pui Khanan pa kawn deuk khankix. Lheu khaing an kix ang hawt ti yuh awm gumlox pingnyap pa tawx Siyiex ka kix. Kix ang lai krub ka Siyiex pa mawh pa meh, kix hawt ti krub ka siyiex pa koe ka daux meung Khanan heue. Mawh kheu ang simiang koe ka daux pui Isarilax, kix nieb yuh pa simie kix ti yuh awm pa koe rhawm tix heue.




Mawh kheu ang kix koe krax cu nghiiet, Siyiex kieh kix som ka pui pa koeng khankix heue. Siyiex kieh pui koeng khankix tud rhim ka kraung khrai pa koe kix, gleeing dee ot kix mai pah kix yum heue.




Mawh kheu nan Siyiex tawx cao kaing pa sang pon taoh ka pui Isarilax, pa sang deeh pon sum meung pui Isarilax yiien yawg heue. Kix ang cu nghiiet ka Siyiex, ca deeh krub ka riieng rao khankix heue. Mawh kheu nan Siyiex ap kix ka daux tawm taix pui pa koeng ka kix, pa mawh pui Midian Aliah num heue.




Pui Midian khankix tud rhim ka priex pa koe kix mai yuh ceu pa sum kix khankix laux leeing heue. Kheu kied lhat kix, kix mox tix daux tiex daux rang khankix heue. Deeh ghoik pui Isarilax yiiem mai khiox khaw Siyiex taoh ka kix heue.




Tix ngaix pui pa kaux Gideon mox ti pah nghox ca son sang ang pui Midian yaox heue. kawncau Siyiex hoek ka Gideon, “Simiang Siyiex ot taux mai maix, pa mawh pui pa ting riang ting rao mai pa koe rhawm vao rhawm kua heue. Hu taoh ka pui Isarilax khaing tawm taix pui Midian awx.”




Siyiex nhie Gideon yieh khu dee tan Balax pa krub keeing nawh laux leeing heue. Kheu lhat Gideon ka pui khankix nawh tom yieh ti tik khu dee tan Balax laux leeing yam pon sawm heue. Khaix an nawh sum khu dee tan son Siyiex ka dah dee an heue.




Hoek singaix khaix plak pon ngawb, yam yaox kix khu dee tan Balax hoik laux leeing khawm uik, kix song rhawm ka Gideon mai hu ka nyiex Gideon son sang pah ka nawh heue. Keeing Gideon ah nin, “Jao pa tix pex teem ka siyiex pex. Phan kix mawh siyiex tete kix tag sang pon tieb tie ka tokaux cao tix heue.”




Khaix an pui Midian baox hoek ka pui Isarilax son sang teei kraung khrai kix heue. Pui Midian kied hun tom ang lai uik simin heue. Gideon kraix khrawm pui Isarilax son sang deeh yuh naing ka pui Midian heue. Gideon tom rawg Siyiex jhi mhai pa daox deng ra ceu son sang tawng grawng Siyiex shiao ang shiao ka nawh heue.



Gideon tom deuh hauk yung piang tiex mai rawg mhaing ka Siyiex son sang kieh rawm ciex lih piang hauk yung an mai kieh tiex kroh pon ngawb cao cao heue. Siyiex kieh nawh mawh awm pa rawg mhaing nawh heue. Sawm singaix khaix nawh tom deeh rawg mhaing son sang kieh tiex lan mai kieh hauk yung kroh heue. Siyiex deeh kieh mawh awm pa rawg mhaing nawh heue.




Pui Isarilax hoek ka Gideon loe mheen mai ra rheng heue. Viang mawh nan mawh kheu Siyiex ah kix kied nie, Gideon tom deeh plo i pui pa lhat puing naing ra rheng mai ra yieh kaux deeh ing heue. Viang mawh nan mawh kheu ah Siyiex pui kawn nie, Gideon tom teei pui 300 kaux mai plo i tang kaux dee ing heue.




Sawm an Siyiex nhie Gideon hu daux tab Midian ah nin, “Phan maix mhong lox pa krai kix, maix tag ang lai lhat ka kix heue.”

Mawh kheu nan Gideon tom hu daux tab pui koeng daux sawm an heue. Yam bleeh nawh daux tab, nawh mhong pui naing Midian tix kaux krai ca maox tix ka paox grawm tix heue. Khaix hoik mhong Gideon deeh bleeh ca maox an mawh grawng pa sang pex nawh ka pui Midian, Gideon yaogyaw ka Siyiex heue.




Khaix an Gideon tom deeh hoek ka pui naing nawh heue.


Nawh tawx teettawng ti mu mai aw tiex pa koe kawk ngu ka plak daux tix mu ka kix ku kaux heue. Gideon kieh kix vung viang ka tab pui Midian heue. Mawh kheu sau kix kawk ngu daux aw tiex, pui Midian ang chix yaox ka kix heue.




Khaix an pui Isarilax tom max aw tiex pa sau kawk ngu an mai phlu teettawng pa viex tix heue. Kix yo lox ah nin, “In mawh vaig Siyiex mai Gideon heue.”




Siyiex kieh pui Midian to tua, sivix mai kieh kix deeh pah paox tix tix kaux lai tix kaux heue. Pui Isarilax pah ka pui Midian tom nie mai pheet pui pa kawn deuk khankix lih khaing haktiex an heue. Singaix an pui Midian yum tix shien mai ra mheem heue. Siyiex taoh ka pui Isarilax heue.




Pui Isarilax koe rhawm ti yaog Gideon mawh simiang kix heue. Viang mawh nan Gideon ang rieb ka pa rawg mhaing kix mai nawh rawg kix tawx ti cie krim khri pa pon tud rhim kix khaing pui koeng khankix heue. Mawh kheu nan Gideon pon khri tom nie heue.



Gideon yuh sibex dha dawd taix ka khri an kix heue. Viang mawh nan pui Isarilax krub ka sibex an heue. Mawh kheu nan sibex an deeh lih mawh kie pa taong ka pui Isarilax heue.



Mawh kheu krub pui Isarilax ka riieng rao, Siyiex tom tawx krax kha hoek piang kix. Kieh kix som ka pui koeng khankix heue. Yam rawg mhaing pui Isarilax Siyiex taoh ka kix, Siyiex baox tawx cao teem ka kix tix kaux heue. Krax pa yuh phimap, pa yaox ti kham geu son phimap, pa deeh doh keud ka phimap, pa taoh luan khaing phimap, ceu in kix hoik lih ti mawh ka daux pui Isarilax tom nie bawg heue. Siyiex hoik ploi pui tom nie kaux son sang taoh ka pui Isarilax khaing pui koeng khankix heue.



Deeh ghoik pui Isarilax tom rawg mhaing simiang tix kaux ka Siyiex heue. Kix simie ti cie simiang pa Ihaong, pa koe riang rao mai pa pon tuk thung kix ka daux naing heue. Siyiex ang khaw rhawm ka lox pa rawg mhaing kix heue. Viang Siyiex ang khaw rhawm ka ceu pa mhaing kix kawx Siyiex tawx kix cie simiang tix kaux awm pa rawg mhaing kix heue.

K. Deeh Theng Ka Been

1. Khaix hoik yum Yawsux pui Isarilax khankix yuh pa tix?
2. Kheu ang kix cu nghiiet, Siyiex tawx krax pa kha rhawm ka kix yuh ka mawx?
3. Siyiex laug Gideon yuh ka mawx, son sang taoh ka pui Isarilax?
4. Kheu pa tix pui Isarilax sang pah ka Gideon?
5. Son sang yuh naing ka pui Midian, Siyiex nhie Gideon kraix khrawm pui Isarilax yuh ka mawx?
6. Siyiex kieh pui Isarilax yuh naing ka pui koeng yuh ka mawx ?
7. Gideon mhaing ceu pa tix ka pui Isarilax? Nawh yuh pa tix ka an?
8. Sibex khri pa yuh Gideon lih ti mawh ceu pa tix ka son pui Isarilax?

Kh. Krax Pa Doh Rhawm Ka Been

1. Siyiex nhie pui koeng khankix tuktiak ka pui Isarilax tom nie bawg. Maix keud Siyiex simie kix tawng ceu pa tix?
2. Vaing Gideon mawh pui pa yuh kaing ma kawx kheu pa tix Siyiex laug ka nawh?
3. Mawh kheu pa tix Siyiex laug pui naing 300 kaux ngie?
4. Viang pui Isarilax khaw rhawm ti kieh Gideon yuh simiang kawx Gideon ang rieb ti yuh simiang, maix keud yuh ka mawx ka grawng an?

G. Krax Pa Deeh Shiao Daux Ju Tix Khaing Been

1. Yam yaox maix krax pa gau pa sawn Siyiex ka maix, maix sang yuh pa tix?
2. Maix yaox Siyiex yuh ka mawx ka daux been in?
3. Maix pon riang rao baux mawx ka daux been in? Mawh kheu pa tix?

Ng. Ceu Pa Rieb Gau Ex Khaing Been In

1. Yam pi awm ex ka Siyiex, Siyiex tawx krax tuktiak tukte ku ceu ka ex, son sang deeh veeh tix hoek ka Nawh.
2. Viang ex ang mawh pui cheung kawx, Phan Siyiex shiao ka ex, ex pon yuh kaing pa ting pa lhaong heue.
3. Siyiex simie tix shiao ka ex ka daux kaing pa ting pa lhaong Nawh?

P. Baux Lai Pa Caw Tix Ci

Lai Lox Kab 19:23

Rawm pa lhat pa graung ka Simiang Siyiex mawh pa dex dawd mai pa im ju mai pui pa koe rhawm yuh nan koe krax vhah rhawm rhi mai nawh ang yaox krax khi rhawm khi rhi.

